

兩
浙
名
賢
錄

兩浙名賢外錄卷之四目次

空空

隋

法應

慧實

住力

大志

道成

智暉

智越

波若

法彥

智噪

真觀

慧因

慧璧

道齊

法智

唐

法敏

法說

慧持

智觀

義褒

惠明

禮宗

印宗

玄覺

玄策
肘

慧忠

神邕

智慧

玄綱

道岸

玄儼

德秀

大光

神智

慧海

法海

智威

附 慧威

玄朗

慧明

子瑀

乾峯

道光

守直

曇一

齊齡

附 如隱

辯秀

惟實

未義

明淨

齊一

靈默

法常

智藏

惟寬

藏真

玄覽

稠錫

惟則

鑒宗

洪謹附

道悟

法相

三平和尚

少康

天然

文舉

道遵

豐干

寒山

拾得

靈祐

道欽

圓修

如訥

良价

法明

湛然

船子和尚

韜光

會通

景欣

圓澤

道幽

文遠

惠符

神脞

玄宗

元慧

崇惠

允文

慧聞

澄觀

一行

兩浙名賢外錄卷之四月次終

兩浙名賢外錄卷之四

東海徐象梅仲和氏謨

武林宋守一化卿氏閱

空空

隋 共一十五人

法應

法應姓王氏會稽人弱冠出家事沙門曇崇學宗禪業
崇公定業既深偏蒙印可徒衆五百金委維持教授獎
擢允開衆望開皇十二年勅令搜簡三學業長者海內

通化崇於禪。府選得二十五人。其中行解最高者。應爲之長。勅城內別置五衆。各使一人教習。領徒三百。於寶塔寺相續傳業。四事供養。金出有司。仍造經一藏。躬親受持。應素無所患。忽云。吾今將逝。已有香花見迎。言訖。合掌端坐而逝。世壽八十。

慧實

慧實。潁川許氏子也。少出家。志敦幽尚。遍履名山。梁末遊步天台。綜習禪業。入房閉戶。山卽蕩門。衣鉢隨身。惟餘。終身絕迹。人。世者。五十餘年。貴尚頭陀。恒居冥默。自

少及終歸不親物雖形衰年積而清苦之志老而彌篤
卒年九十有六

住力

住力錢塘人青年雉染卽任繕造之功宜導四部以授
波爲第一乃建餘閣貯優曇王像旣蒙勅慰精室風竊
焚身以留像閣火滅合掌凝然閣非無恙像亦旋歸
部人夫無不欽住力之捨身術法言者無不泣下虞承
典世南爲之碑記

大志

大志會稽人幼事天台智者誦法華經索然閒靜音聲清轉聽者忘疲後於廬山甘露行頭陀行有時投身猛獸悉皆避去食粒若盡惟飲澗水續命而已如是七載禪誦不休會大業中屏除佛教慨大法凌遲遂身著弊衣於佛堂中慟哭三日誓捨形骸申明正教卽往東都上表曰願陛下興隆三寶貧道當然一臂於嵩岳用報國恩帝許之遂設大齋士衆通集志絕糧三日登大欄中布裹其臂准之以蠟如炬然之光照岩岫晃然大明衆見苦行痛入心髓面忘形色不變或誦經文或讚佛

德成爲衆說法聲聲不絕燒已下棚踞趺入定七日而後卒

道成

道成字明範姓陶氏丹陽人少而人道住永嘉崇玄寺事式法師爲弟子儀貌瓌美奇姿拔衆羣伍目曰神童具戒之後學超儕輩數論毘曇染神便悟大同初開講京師意樹心花增暉且曜析理質疑聰者忘倦學士慕藏法祥等並遊方講說法輪常轉傳茲後談利益弘多卒年六十有八停龕旬日合掌端坐如生寔日香氣勃

發結爲紫雲、停如華蓋、觀茲靈瑞者、無不傾歎、

智晞

智晞、潁川陳氏子也、童稚卽有出塵之志、稍長、從智者
薙落、稟受禪訣、加修寂定、如抹頭焚、道力所持、至感山
靈、捨木、漁師斷筴、一切含靈、盡歸安養、時有弟子道且
在房誦經、忽覩一異僧、身着納衣、手持錫杖、形神爽俊、
從外而來、相去二十餘步、纔入路、東隱而不見、俄聞東
山聲、鍾大音震谷、晞云、噫、喚吾歸去也、遂命香湯澡浴、
合掌而逝、窆龕在智者埵前二百餘步、

智越

智越臨海人。受業智者大師。嘗誦法華經。瓶水自盈。居
露山精舍。行法華三昧。人天瞻仰。大業十三年。終國清
寺。茶毘。舌根不毀。色紅嫩如初。蓮出水。四衆歎異。以爲
誦經之驗。

波若

波若未詳氏族。高句驪人也。陳世歸國。在金陵聽講。深
解義味。隋初游方學業。遂入天台。北面智者。求授禪法。
智者曰。汝於此有緣。宜須幽栖。以成妙行。華頂是吾昔

日頭陀之所、山祗威猛、非大乘根性、不能安止、汝往彼
學道、當有弘益、無須慮衣食之不給也、波若承旨而往
習禪樹下、脅不親物影、不出山者、十有六年、一日忽下
到佛隴上寺、淨人見三白衣人、擔衣鉢以從、忽然不見
至於國清、語諸同意云、波若將歸故來作別、言訖端坐
而逝、四衆送龕山所、出寺大門、廻舉示別、雙目忽然開
明、至山仍閉、

法彥

法彥姓張氏、清河人、周朝滅法之年、避難投陳、遇智者、

於金陵隨還至台服膺請業授以禪那自是不停房舍
每處山間林樹之下專修禪寂三十年中常坐不卧數
有山祇變形撓試晏坐怡然不干其慮或時入定七日
方起具向師說所證法相師曰如法所說是背捨觀中
第二觀也卒於國清寺世壽六十有三

智瑛

智瑛清河人爲智者禪師高足遺行法華懺悔第二七
日初夜懺訖還就禪床如欲安坐乃見九頭龍從地湧
出上昇虛空明旦諮白智者云此是表九導衆生聞法

華經將來之世破無明地入法性空爾後住寶林寺行
法華三昧至貞觀十二年示寂

真觀

真觀錢塘人字聖達生有青相出家通經律論尋謁天
台智者禪師受禪觀開皇十五年於重隱山石室頭陀
冥坐衆建南天竺寺請師居焉是爲開山始祖師有雅
操文帝三徵秦王兩延皆以疾辭大業中因山行自標
葬地未幾示寂

慧因

慧因姓干氏，湖鹽人。晉太常寶之裔也。十二出家，事開善慧熙法師，稍長，遍歷諸方，參求法要，造長干辯法師，稟學三論，窮實相之微，言泓滿字之幽旨，寫水一器，青更於藍，辯後歸靜山林，便以學徒相委，受業弟子五百餘人。踵武傳燈，將三十餘載，遂感冥王遣迎說法，時經七夕，若起深定，謂經三月，其意該幽，顯行極感，通有如此。隋仁壽三年，起禪定寺，因是法門，龍象奉爲上座，講肅禪學，清穆僧倫，事等威權。同恩啓旦，及唐運重興，佛日選十大德，因當其一，以身御法，不令而行，後進具戒。

者無不稟其羯磨、固定慧兩明、空有兼照、弘法四代、常
顯一乘而真燒物情、喜怒無色、故遊其道者咸莫測其
位、云以貞觀元年卒於大莊嚴寺、世壽八十有九、弟子
等爲建支提塢塔、勒銘封樹、文則蘭陵蕭鈞所製也、

慧壁

慧壁姓弘氏、嘉興人在胎孕時、母聞腥卽噉、及生而母
輩便不食其乳、母如茹蔬、食乳如常、十七出家、流水音
稍壯、周遊訪道、無擇夷險、四論三經、咨詢賞要、學旣明
達、還止舊居、四方負策來請者、常數十百人、曉夕誨誘、

樂說無倦背不着席四十餘年老無久力時憑几性
海淵泓遊者莫測第云不可思議大德而已卒年七十
道齊

道齊錢塘人母夢擎日月而生幼入庠序經籍淹通及
曾定天竺羣鹿馴擾巨蟒驚獸向之不動講雜花經雲
地忽生雙蓮山椒乏水卓錫泉迸四方緇素無不皈依
以爲慈氏下生也

法智

法智者不詳何許人髫年離俗留心講肆晚歲以逕直

之門莫如念佛。每謂人曰：我聞經言：犯一吉羅，歷一中劫，入於地獄，可信。又聞經說：一稱阿彌陀佛，滅八十億劫生死重罪，則未之信。人難云：何故生大邪見？俱是佛言，急須念佛。久則三昧現前，乃於國清寺梵率臺上，晝夜勤念佛。忽預舜道俗云：生西方去。令親識爲吾設齋。中夜無疾而逝。時有金色光明來迎，照數百里。江上船中謂言天曉，遲久方明。始知智之往生云。

唐 共一百一十九人

法敏

法敏、丹陽人。八歲出家。事英禪師爲弟子。入茅山聽明法師三論。悟其宗旨。貞觀元年。出還丹陽。講華嚴涅槃。二年。越州田都督追還一音寺。相續法輪。會稽士俗請住靜林。講華嚴經。法音所動。細素雲湧。正講之際。忽有蛇懸半身。在敏頂上。長七尺許。作黃金色。吐五色光。終講方隱。復還一音。夜有赤衣二人禮敏曰。法師講四部大經。功德難量。須往他方教化。故從東方來迎法座。弟子數十人同見此相。忽三日夜。無故晦冥。至期將逝。忽放大光。夜明如晝。因爾遷化。

法說

法說錢塘人母夢吞珠而生遺形理性與山木爲羣嘗
登法座講經有光如紅縷漸大遶空散作百道金光凡
在法席之下人天八部無不洞於心目所講之經如懸
迦鳥音人耳者悉生歡喜四方學徒聞之雲集後示疾
涅槃異香經月不散弟子爲清涼國師

慧持

慧持姓周氏汝南人身長七尺色相光偉執持威儀不
妄迴盼時人目爲象王持歷探三論鉤深窮遠兼善者

莊易史談玄之大寄言法理隋末避難越州住弘道寺
常講三論大品涅槃華嚴累年不絕閉影深山者將三
十載跏坐不卧苦鍊至終一日忽告弟子曰吾欲往他
方教化急作食及時至三下前食還房跏坐欽容而逝
弟子謂言人定至七日不起忽聞異香方知坐脫跏結
鏗然申而不解乃坐送大禹山玄素萬餘人悲歎相嗟
至於窆所世壽六十有八

智凱

智凱姓馮氏丹陽人父早亡六歲聽吉藏法師講法華

火宅品夜告母曰經明火宅者只我身耳若我是火宅
我應燒人既其不燒明知無我明日遂詣藏出家身相
黑色故號黑凱年十三隨藏會稽住嘉祥寺門人英達
無敢右之尋移餘姚小龍泉寺常講三論大品等經不
畜衣鉢不受供施自僧而已佛殿之後忽生一池便曰
只飲此池可以終老貞觀十九年四方義學請出嘉祥
求講三論纔離龍泉小池卽竭凱聞歎曰池竭食亡吾
無反矣講畢忽依常盤座手執如意默然而逝坐送大
禹此七日供養時聞異香

義褒

義褒姓薛氏晉陵人初從蕪州永定寺小明法師稟學
華嚴大旨專經強對當時稱為僧傑時婺州曠法師四
經三論江表推高褒詣座下敬竭義筵緣思披釋諸方
俊銳將事別輪曠乃勉褒行傳燈禮褒從之傳經述論
者餘三十年教迄五湖名馳三輔後住金華法幢寺弘
道不倦日坐忘食詔徵同三藏玄奘法師翻諸經論慈
恩開創宏旨有空雙遣藥病齊亡乃有負氣肝衡者舉
褒為提紐解決責以三關徵研五旬當時莫彥預席者

莫不歎其疎拔之神、青、伏其辯洽之鈞、利也。頃之駕往東都、別召追往、命於淨土講解經論七、衆載驅、英聲逾盛、不久遘疾卒、年僅五十有一、勅葬金華舊寺、贈贈之榮光、聞遠近。

惠明

惠明姓王氏、杭州人、出家遊遁、迹無方所、時越州敏法師聚徒揚化、遠近景赴、明在法席二十五年、衆侶千僧、解玄第一、持衣大布、炎凜不更、時目爲青布明、爲人翹勇果敢、策勤無偶、後至荊州四望山頭陀、見二虎交鬬、

自往分解虎各弭耳而去形止影俱所去無戀卽經所謂如鳥凌空者也龍朔初至京遊觀凡交言論者無不服其神解不久旋反云往曲江依閑修道竟莫測所終

禮宗

禮宗姓宋氏會稽人道氣道壯志求之微願遂出塵決除鞅絆聞長壽和尚通達禪觀往叩其關學習之心未嘗少懈長壽歎曰汝之出塵有大利益可謂良玉度尺雖有十仞之士不能掩其光矣乃奮蒸臆華注涅槃經懷鉛握槧周於二載挫銳解紛怡然理順遂成夾注八

十卷卒年九十有七

印宗

印宗姓印氏，異人。從師出家，精涅槃大部。往朝春謁忍大師，未契宗旨。後於廣州法性寺講涅槃經，遇六祖大師，言下薦機，始悟玄理。遂以能爲傳法師。嘗採自梁至唐諸方達者之言，著爲心要集。又纂百家諸儒士三教文意，表明佛法者，重結集之。手筆逾高著述，流布至先天二年二月，於會稽妙喜寺示終。囑僧輪王法葬之。世壽八十有七。

玄覺 玄策附

玄覺字明道，永嘉人，姓戴氏。精天台止觀圓妙法門，嘗與東陽玄策同詣曹溪。初到，振錫携甌，遶祖三匝，卓然而立。祖曰：「夫沙門者，具三千威儀，八萬細行，大德自何方而來？生大我慢。」覺曰：「生死事大，無常迅速。」祖曰：「何不體取無生？」了無速乎？覺曰：「體卽無生了。」本無速。祖曰：「如是如是。」於時大衆無不愕然。覺方具威儀，奉禮，頌與告辭。祖曰：「返太速乎？」覺曰：「本自非動，豈有速耶？」祖曰：「誰知非動？」曰：「仁者自生分別。」祖曰：「汝甚得無生之意。」曰：「無生

豈有意耶。祖曰：無意。誰當分別？曰：分別亦非意。祖曰：善哉。善哉。少留一宿。時謂一宿覺。既回故處。學者輻輳。號真覺大師者。證道歌一首。及禪宗悟修圖。自淺之深。慶州刺史魏靖緝而序之。成十篇。目爲永壽集。盛行於世。先天二年。示寂。勸謹無相大師。落曰：淨光。玄康金華人。嘗游方。屆於河朔。有僧智隱者。每謁黃梅庵。居習處。自謂正受策知。隱所得未真。往問曰：汝坐於此。作甚麼。隱曰：人定策曰：汝言人定。有心耶。無心耶。若有心者。一切蠢動之類。皆應得定。若無心者。一切草木之流。亦合

得定曰我正入定時則不見有有無之心策曰既不見有有無之心卽是常定何有出入若有出入則非大定
陞無語良久問師嗣誰策曰我師曹溪六祖曰六祖以何爲禪定策曰我師云妙湛圓寂體用如如五陰本空六塵非有不出不入不定不亂禪性無住離住禪寂禪性無生離生禪想心如虛空亦無虛空之量陞始開悟策後却歸金華大開法席

慧忠

慧忠諸暨人姓冉氏自得心印居南陽白巖影不出山

者四十餘年肅宗重其道行召居西禪院事以師禮及
代宗臨御復迎止光宅精藍十有六載隨機說法時有
西天大耳三藏到京云得他心慧眼帝勅令與國師試
驗三藏纔見師便禮拜師問曰汝言得他言通耶卽令
汝道老僧在什麼處三藏曰和尚是一國之師何爲却
去西川看競渡師再問汝道老僧卽今在什麼處曰却
尚是一國之師何得却在天津橋上看弄獬獬師第三
問還如前語三藏良久因知去處師叱曰這野狐精他
心通在什麼處三藏無對一日喚侍者侍者應諾如是

者三。師曰：將謂吾辜負汝，却是汝辜負吾。有僧問：若爲得成佛去？師曰：佛與衆生一時放却，當處解脫。問：作麼生得相應去？師云：善惡不思，自見佛性。問：若爲得證法身？師曰：越毘盧之境界。曰：清淨法身作麼生得？師曰：不着佛求。再問：那個是佛？曰：卽心是佛。曰：心有煩惱否？師曰：煩惱性自離。曰：豈不斷耶？師曰：斷煩惱者，卽名二乘。煩惱不生，各大涅槃。又曰：吾今答汝，窮劫不盡，言多去道遠矣。所以道說法，有所得，斯則野干鳴，說法無所得，是名師子吼。大曆中，右脅長往，遷靈於黨子谷，建塔賜。

謚大證禪師

神邕

神邕字道恭姓蔡氏諸暨人聰悟過人年十二出家住
華寺每覽孔釋二典一過能誦從玄徽師通四分律
又從左溪習天台止觀法華玄疏覺網諸經秘捷載盛
觀性知空至於歷夏遂司南學者乃振錫西遊止於長
安公卿藉其風華追慕者結轡而至一聞玄著無不獲
禪者作草子春高氣而瞻學士之誦抗子春折角猶在
焉

師子時人以爲知言先是中岳道士吳筠造論數篇斥
毀釋教昏蒙惑之邕乃襲世尊之攝邪見復寶琳之破
魔文爰據城塹以正制狂旗鼓纔臨吳筠覆轍遂著破
倒翻迷論三卷東南佛法再興邕之力也貞元間示疾
而滅報齡七十有九僧夏五十

智慧

智慧越人形貌短小神觀甚雋初依徑山國一禪師受
具後叅大寂發明心地因爲大寂送書與忠國師國師
問曰馬大師何以示衆對曰卽心卽佛國師曰此外更

有何言對曰非心非佛或曰不是心不是佛不是物國
師曰猶較些子慧曰馬大師卽恁麼未審和尚如何國
師曰三點如流水一曲似禾鎌慧後隱居伏牛山一日
謂衆曰卽心卽物是無病求病句非心非物是藥病對
治句僧問曰如何是脫洒句慧曰伏牛山下古今傳又
嘗自吟云宇內爲閒客人中作野僧任從他笑我有處
自騰騰

文綱

文綱姓孔氏會稽人十二出家冠年受具恭有辭檢口

無滛言尋詣京兆道成律師稟見尼藏每登壇講律幾
若斷山或風雨宴居或晝夜獨行故能吉祥在手不捨
其瓶威德迎風不絕於氣八方來學讚歎者舉袂雲騰
發聲雷駭是以一時法主四朝帝師同迦葉之入城遇
匿王之說戒竹園林外別有沙彌畢樹枝間廣聞鷄鳥
所以受潤者轉入見者深萬病已痊獲歡喜之藥一心
不染解煩惱之繩景龍二載中宗延入內道場於乾陵
宮爲內尼受戒先天初睿宗又於刪繁請爲菩薩戒師
堯率天上親聽法言王舍城中普聞淨戒賜絹三千餘

匹悉付常生隨事修營一經中書於開元十五年怡然
長往世壽九十有二滑臺太守北海李邕爲之碑記

道岸

道岸姓唐氏潁川人少業儒有才名忽弃去落髮受具
洗心訪道堅修律儀深入禪慧夜夢迦葉來爲導師朝
闍真經宛昇冥際由是聲名籍甚推爲經行領袖後歷
會稽龍興寺揚越江淮緇素雲赴窺天挹海無不虛禮
實歸時號爲大和尚孝和皇帝召入內庭請爲菩薩戒
師親率六宮圍繞供養仍圖面於林光宮御製圖讚由

戒珠皎潔，慧流清淨，身局五篇，心融八定，學綜真典，觀
通實性，維持法務，綱統僧政，律藏其今，傳芳象教，因乎
光盛，當時以麟閣丹青，未嘗有讚，岸之遭遇榮寵，過之
尋辭還會稽，以開元五年，減度於本山，初岸本文綱律，
師高足也，以江表多行十誦律，罔知四分，岸請帝墨勅，
執行南山律宗者，岸之力也。

玄儼

玄儼，姓徐氏，諸暨人，少出家，隸懸溜寺，弱冠從光州岸
師受具，後遊方徧，叅諸宿，俱蒙印可，由是道尊戒潔，名

勅京師安國授記並克大德尋還江左偏行四分因著
輔篇記十卷羯磨述章三篇初光州岸公嘗夢神僧謂
曰玄儼當爲法器云何教以小乘後乃命宣般若由是
研精覃思採摭舊學撰金剛義疏七卷多古德之所未
詳而獨發揮光明如指諸掌後住越州法華寺四方奉
仰者數若稻麻筭同竹葦宴坐不出幾三十年開元二
十四年帝親注金剛般若經詔頒天下普令宣講都督
河南元行冲請儼重光聖日遂令盲者見日月之光聾
者聞雷霆之響儼演暢之力居多道俗受法者殆出萬

人入境住持舉無與比。義學宗之。俱頂禮爲人天眼目。以天寶元年化盡而逝。窆於寺南泰山之下。高樹雙塔。光明踰於白雲。列植千松。秀色羅於明月。

德秀

德秀姓孫氏。富陽人。少棲梵宇。正護浮囊。匪定常師。留心律府。嘗哀鬼神乏食。每於中夜。施其淨飯。浙汭飛走之倫。亦餐法食。秀或林下經行。輒飛鳴環遶。後終於定山。頗多靈異。則天寶初載也。遷神入塔。天降舍利七顆。門人以瓶盛之。瘞於塔下。或發之。見秀齒上生舍利。紛

紛而墜焜然五色後人還累篋以爲浮屠鄉人云恒有
白蛇蟠屈守護樵牧之童無敢近者

大光

大光姓唐氏安吉人持法華經其聲通於有頂肅宗召
見拱立而歎曰昔夢吳僧口持大乘五光隨發音容宛
若甚慰朕心因賜名大光勅住千福寺清夜誦經遶遶
通於聖聽帝聞而異之以爲希有使中涓覘之見白光
滿室朗然若晝梵音方作光起面門如開毫相經聲向
息光亦隨歛尋歸吳興示寂於法華寺光一飯七十歲

納四十年歲無浣濯而或香鬱然異興刺史李紳撰
銘題云墨詔持經大德神具之碑

神智

神智義烏人姓力氏黃帝力牧之後少出家雲門寺年
十二一食斷中持大悲心咒應法登戒峻勵恪勤遊方
至於暨陽見其山水明秀歎曰營廷之魚潛於茂澤此
地亦吾之藪澤也遂結茆以居恒咒水盃以救百疾飲
之者立差士民敬仰日給無算皆號之曰大悲和尚

慧海

慧海越人初依大雲寺道智受業。往參馬祖。祖問曰。從何處來。曰。大雲寺來。祖曰。來此擬何事。曰。求佛法。祖曰。自家寶藏。不顧拋家散走。我這裡一物也無。求甚佛法。海遂禮拜。問曰。那箇是慧海自家寶藏。祖曰。卽今問者是汝寶藏。一切具足。何假向外馳求。海於言下大悟。明日。馬祖告衆曰。越有大珠圓明光透。無遮障處。海遂作禮承事六年。後以受業師老。歸越奉養。乃晦跡韜光。外示癡訥。一日。有法師來謁。曰。擬伸一問。師還對否。海曰。清潭月影。任意撮摩。曰。如何是佛。海曰。清潭對面。非佛。

而誰又僧問和尚如何用功海曰飢來喫飯困來打眠
曰一切人總如是用功否海曰不同曰爲甚不同海曰
他喫時不肯喫百種須索睡時不肯睡千般較量所以
不同僧杜口無語海時閒居補衲忽僧謂曰將敗壞補
敗壞海曰何不道卽敗壞非敗壞其僧作禮而去

法海

法海字文允姓張氏吳興人少出家鶴林寺白駒匪食
其場苗金翅俄翔於海面曲從師教周覽羣經大堅納
川鄧林藜羽是以圓入一性學階空王擅當代獨悟之

名剖先賢不決之義一時外學六籍皆通嘗謂人曰佛法一門極唯心地餘皆推輪也天寶中與揚州法慎律師講肆同曇一靈一等推爲游夏黑白二使多從求益云

智威 慧威附

智威縉雲人姓蔣氏穎脫塵蒙心遊物表聞天台宗教遂從淮頂禪師咨請心要旣而得一融道體二居宗定慧方均寂照相半雖云自了急在利他天與多能富有辭藻嘗著桃岩寺碑與頭陀寺碑氣度相表或云威是

徐陵後身也。後以法眼付門人慧威。慧威姓留氏。東陽人。總角之年。露其舊習。扶開愛網。徑入空門。不滯一方。仍恭三益。聞縉雲盛行禪法。裹足造焉。刻志忘勞。觀威犒輿一日千里。罔不推稱。至有成業時。謂小威。

玄朗

玄朗姓傅氏。烏傷人。梁大士翕之六代孫也。九歲讀經。日過七紙。從天台慧威法師習止觀禪門。凡一宗之教。無不研其精義。復以觀音悲智爲事行良津。乃遊心十乘諦冥三觀。獨居一室。三十餘秋。時有盲狗來伏朗前。

長嘯宛轉似有所祈明。然憫之焚香禮佛爲狗儀。悔七日而盲。狗豁然。天寶初示寂。而終報齡八十有二。僧夏六十有一。朗細心修行。以身狗律。一鬱多羅四十餘年。一尼師壇終身不易。食無重味。居必偏厦。非因禮佛。未嘗輕出禪關一步。凡稟其戒律者。無不精嚴。自持第其傳法。是爲五祖。天下皆號之曰左溪。

慧明

慧明姓陳氏。蘭陵人。初習律藏。嘗語人曰。昔者繁刑。首作伯成子道焉。吾雖不捨律儀。而惡乎評論紛紛若此。

即心之法至矣哉乃西請方巖蟻開心地止於魚陂道
場有大巖來覆如撫家槐時爲飢羣至必號呼先
告往往有徵尋移止佛川泉側有具王古祠明爲神說
戒遂斷血脾神復捨祠爲寺肇基之日於祠下獲一銅
盆下有篆文慧明二字建中初示滅其日庭水春染山
雨畫冥猛虎繞垣悲鳴而去

子瑀

子瑀字真瑛姓沈氏德清人總角出家壞衣削髮煤臭
世事於洛京大福先寺受具於是佩菩薩印燭如來燈

證聖中歸於大雲道場堅持律柄常禮一萬五千佛名兼慈悲懺日夜一匝忽夜有聖僧九人降於禮懺之所相與行道彈指而去或夜無燈燭心口自念圓光照室如坐月中天寶十一年秋禪坐而化明年啓龕茶毘容色不變如生雖少林孕髮斬春育髮何以過是當時聞見者莫不歎其希有也

乾峯

乾峯越州人嘗與雲門相難箭鋒機對索弓而笑有僧問涅槃門路以拄杖畫地曰在此

道光

道光姓褚氏踰訖出家方冠受具詣光州和尚學通毘
尼夏漢德崇東南稱爲義虎雲雨慈味坐鑄道聲持法
華三昧沒身不怠上元初終於本寺世壽七十有九初
先歿前三日昧爽支疾疑神僕色身觀彌陀具相現但
其前滿庭碧花昔所未觀四日質明忽有異人請光爲
和尚遂開目彈指曰但發菩提心至五日曼陀羅花自
天而雨須臾合掌端坐而逝

守直

守直字堅道錢唐人性范氏初從支硎圓大師受具足
律儀是夜眼光現長一丈餘持久方滅練行三年受菩
薩戒傳楞伽心印講起信論南山律鈔各二十餘遍平
等一兩大小雙機在乎圓音未嘗少異乃立願誦法華
經夢神人施珠一顆及覺宛然在握後住靈隱寺一日
忽語侍者曰夫至人乘如而來乘如而去示其必然也
而愚夫欲以長繩繫彼白日豈可得乎吾景落為輪豈
落久也無幾示滅世壽七十有一

雲一姓張氏越人少聰雲門寺茂亮法師經論一聞
解法師奇之曰此佛子也遂削髮受記既而西遊長安
習毘尼藏學惟識俱舍等論於是蓮花不染之義甘露
甚深之旨一傳慧炬了作梵雄後杖錫東歸一旨演法
凡講四分律總三十五遍江淮釋子受木叉者非一登
壇卽不爲得法天寶十四載浙江潮水南激錢唐大雲
伽藍正當湍悍因請一講律學徒千人咸發大願每正
念摩訶般若以止濤激五月晦日恍惚之間見一神人
衣冠甚偉自稱伍胥稽首謝曰蒙垂法施卽改波流未

逾旬日。漲沙五十里。道俗驚歎。得未曾有。以大曆六年。遷化於寺之律院。報齡八十。僧臘六十一。

齊翰 如居附

齊翰字等至。吳興沈氏子。出家永定寺。後請住虎丘。翰道性洞然。外則淡然。遠不近名。身不關事。長在一室。寂如無人。禪門相部。義疏精敏。罕儔。明法華經王。蕪湖。堽壇。每當請首。大曆十年。人流水念佛道場。是夜西方金中。頓現。卽以是年示滅。報齡六十。有八。初翰之遇疾也。謂門弟子曰。有雀從空飛下。廻翔我前。必謝之期。小聖。

猶病安能免哉。受業門人如隱與吳興皎然結法門。昆弟之交。當時稱爲高潔。

辯秀

辯秀姓劉氏。稚齒出家。事靈隱謀禪師。便能問津。圖入道之意。所聞指訓。如涼風入懷。醒然清悟。天寶初。受戒於東海鑒真大師。傳律於會稽曇一。尋隸名於吳郡之開元寺。時詔天下二十五寺。各定大德七人。長講戒律。秀應其選。後於淨土一門。不愆於念。時時謂人曰。昔聞西方之行。是有相大乘。此乃蓬心不直。非達觀之說。夫

出言卽性發意皆如兩一色一香無非中道况我正念
乎秀登壇一十六番受度者數千百人秀孤制律樞正
持僧統建中初示疾而終世壽六十七法鵬三十五當
其逝日有庭樹一本枝葉扶疎朝花正敷而遽萎謝遷
龕於虎丘西寺松門之右

惟實

惟實富春人四歲不語父喪忽謂母曰生育德重願歸
佛國以報於是出家從本宗禪師密授微旨號曰微師
天寶中振錫大蓬山麓毒蛇猛獸俱爲馴伏尋徙香山

寺貞元二年坐逝建塔於寺異隅葬焉咸通十四年久
有人負漆器五百事入寺曰微和尚於浙西勾線先遣
至此舉問其所在曰溪邊濯足泉趣而出惟見瀑跡
徑直掘墳塔遺屐在傍遂啟塔視之僧坐如生髣髴秀
長遂出而奉之

大義

大義衢州濱江人姓徐氏得法於懷讓禪師卓錫鵝湖
隨機說法憲宗皇帝嘗詔入內於麟德殿講義有一海
師問如何是四諦義云聖上一帝三帝何在又問徧覺

無禪。禪居色界。此土憑何而立。義云。法師只知欲舉無
禪。不知禪界無欲。法師曰。如何是禪。義以手點空。法師
無對。帝曰。法師講無窮經論。只這一點。尚不奈何。義遂
舉順宗問尸利禪師。大地衆生。如何得見性成佛。尸利
云。佛性猶如水中月。可見不可取。因謂帝曰。佛性非見
必見。水中月如何攫取。帝乃問何者是佛性。義對曰。不
離陛下所問。帝默契真宗。蓋加欽重。元和十五年。義
告大興。勅謚慧覺禪師。見性之塔。

明淨高客人少出家。味定爲業。後南游東越天台諸山。
禪觀在懷。無緣世習。而承服縵纒。動止適時。同侶禪徒。
未之弘仰。山粒致絕。日至村中乞食。比還。忽值羣虎。皆
張口閉目。若以飢告。淨曰。吾行山澤久矣。虎兇無心畏
之。今羣列路傍。豈非爲食耶。乃以匙抄飯。以次納諸虎
口。虎得食。皆垂尾而去。後每出乞食。輒飼羣虎。以爲常。
貞觀三年大旱。詔下岳瀆諸祠。普令雪禱。淨應詔於莊
嚴寺僧房禪默。至七日向曉。問守衛者曰。天之西北可
有白虹否。對曰。有。淨曰。雨傾至矣。頃臾雨洽。遂以有年。

勛度三千僧。酬其淨德。尋還義勝寺。莫測所終。

齊安

齊安海門郡人。姓李氏。少依雲琮禪師落髮。後謁大寂。一見契機。乃命入室。示以正法。住塩官鎮國海昌院。大鳴法鼓。聲馳四部。有講僧來叅。安問座主。蘊何事業。對云。講華嚴經。安云。經中有幾種法界。對云。廣說則重重無盡。略說有四種法界。安豎起拂子云。這個是第幾種法界。講僧沉吟。徐思其對。安云。思而知。慮而解。是鬼家活計。日下孤燈。果然失照。一日。謂衆曰。虛空爲鼓。須彌

爲推什麼人打得衆無對。後不疾宴坐。示滅。勅謚悟空禪師。

靈默

靈默。毘陵人。姓宣氏。從馬大師剃落。受具。初參石頭。一言便契。執侍巾瓶者二十年。後入天台。住白沙。復居五洩。僧問何物大於天地。默云。無人識得。伊僧云。還可雕琢也。無默云。汝試下手看。一日忽焚香端坐。示將入寂。僧問和尚向什麼處去。默曰。無處去。僧曰。某甲何不見。默曰。非眼所覩。言畢。奄然順化。壽七十有二。膺四十一。

法常

法常襄陽人姓鄭氏初參馬祖問如何是佛祖云卽心是佛師悟遂居於鄆之大梅山馬祖聞師住山乃令一僧到問云和尚見馬祖得個什麼便住此山師云馬師向我道卽心是佛我便向這裡住僧云馬師近日佛法又別師云作麼生別僧云近日又道非心非佛師云這老漢忒惑亂人未有了日任汝非心非佛我只管卽心卽佛其僧廻舉似馬祖祖曰大衆梅子熟了也忽一日謂其徒曰來其可拒往草可追從容間復聞鼙鼓聲師

云。卽此物。非他物。汝等諸人。善護持之。吾今逝矣。言訖。示滅壽八十八。鵬六十有九。智覺禪師延壽讚曰。師初得道。卽心是佛。最後示徒。物非他物。窮萬法源。徹千聖骨。真化不移。何妨出沒。

智藏

智藏姓皮氏。廬陵人。少精律藏。諱名豫章。天官寺時。仰無休號爲律虎。每登法座。提唱毘尼。辨理析微。連環可解。貞元中。值大寂禪師。篤明心要。遂遊會稽。於杭鳥山頂。築小室安禪。乃著華嚴經妙義。宜吐壺壺學者。歸之。

以元和十四年無疾而終報齡七十有九

惟寬

惟寬衢州信安人姓祝氏年十三見殺生盡然不忍食
乃求出家初習毘尼修止觀後參大寂乃得心要貞元
初始行化於吳越間憲宗詔至闕下白居易嘗詣師問
曰旣曰禪師何以說法師曰無上菩提者被於身爲律
說於口爲法行於心爲禪應用者三其致一也譬如江
河淮漢在處立名名雖不一水性無二律卽是法法不
離禪云何於中妄起分別又問旣無分別何以修心師

云。心本無損傷。云何要修理。無論垢與淨。一切勿起念。
又問。垢即不可念。淨無念可乎。師曰。如人眼睛上一物。
不可住。金屑雖珍寶。在眼亦爲病。又問。無修無念。又何
異凡夫耶。師曰。凡夫無明。二乘執着。離此二病。是曰真
修。真修者。不得勤。不得忘。勤則近執着。忘即落無明。此
爲心要。有僧問。道在何處。師曰。只在目前。曰。我何不見。
師曰。汝有我故。是以不見。曰。我有我故。即不見。和尚見
否。曰。有汝有我。展轉不見。曰。無我無汝。還見否。師曰。無
我無汝。阿誰求見。元和十二年二月晦日。登堂說法訖。

就化勅證大徹禪師

藏典

藏典衡州信安人少詣長沙嶽麓寺禮靈智禪師出家
後於武陵開元受戒因聽律部語同學曰教門繁廣宜
扣總持遂謁龍牙暢禪師參請法要龍牙曰蘊盼不真
佛生非我乎之正本當復何名而從誰得真一言領悟
釋持月遵會昌沙汰後於龍興廣揚道化尋以無疾示
寂世壽八十有一法鵬五十有六

玄覽姓褚氏錢唐人舒國公無量之弟也生而懸解深達實相以崇善本出家師承慧果果一見器之曰江表無真僧又矣其以此子爲法鼓乎後於臨平建剎名曰華嚴復以寺前平湖爲放生池迂迴十里一切鱗尾鱗甲之屬無不唵喁浮沉遂其生性又鑄像寫經追報王考與兄無量晨昏說法以娛其母開元初示寂終於所住世壽八十有四

稠錫

稠錫桐廬人唐開元間卓錫南岳庵前稠木自開因號

稱錫和尚嘗下山未幾復歸庵衆僧不納一日偕二虎至僧衆怖走稱錫曰勿怖止欲次去就耳吾果不能住此庵虎當恣噬我如可再居違吾身三匝虎繞行如數衆懼請留集衆五百遂成大刹

惟則 智禪師附

惟則京兆人姓長孫氏六祖牛頭弟子後隱於天台瀑布之西岩法席漸盛因名其岩曰佛窟一日示衆云天地無物也我無物也然未嘗無物也斯則聖人如影百年如夢孰爲生死哉至人以是獨照能爲萬物之主吾

轉之矣。洪等知之。平有僧問如何是那羅延箭。則云。中
降下也。一日安坐示滅。壽八十。臘五十。有人法嗣爲雲
居禪師。

鑒宗 洪諱

鑒宗吳興長城人。姓錢氏。少依開元高閑出家。學通淨
名。思益經。後謁塢官悟空大師。決擇疑滯。遂止徑山。宣
揚禪教。有小師洪諱。以講論自矜。師謂之曰。佛祖正法。
重截亡詮。洪等海涉於理。何益。但能莫存知見。泯絕性
緣。離一切心。離法真性。謂開茫然。禮拜遊方。至嵩山。東

僧玄旨師以嵐通中示滿證曰。無上大師。即徑山第二
繼也。洪詮具與人姓吳氏。年十九落髮。二十二受滿。是
律儀。因承鑒師之訓。三日忘食。後得悟。為山遂繼。環
徑山第三祖。於法實。為山之嗣也。光化中。白髮而化。

道悟

道悟。東陽人。姓張氏。於杭州竹林寺受具。精修梵行。推
為勇猛。嘗奉國一服。勤五年。載造為大師。重印前解法。
無異說。後叩石頭。一言頓悟。并初所得。豁然未解。後住
天皇寺。學徒依附。歸肩。極述都人士女。嚮風而至。石頭

法席於斯爲盛。僧問：如何是玄妙之說？師曰：莫道我解佛法。僧曰：爭奈學人疑滯？何？師曰：何不問老僧？僧曰：問了也。師曰：去。不是汝存泊處。元和中，示疾。薨，召與座。與座近前。師曰：會麼？對曰：不會。師乃拈枕子拋於地上，卽便入滅。壽六十，臘三十有五。

法相

法相，姓俞氏，長水人。七歲投師受經，三決旬誦通法華。全部弱冠游長安，習毘尼道。諸部同異，無不該綜。業成東返。於開元寺置壇說戒，每有異鳥棲於座側，聽斥不

去講畢而後翻然入雲會昌中忽告弟子曰吾嘗滅矣
儼然累足右脇而逝時衆晝聞天樂夕覩異光建塔於
來穰鄉之原却後五十餘年義州刺史曹信大理司直
吳方修塔發之見相遺骨若銅色勾鈎不解舌相不壞
如芙蓉花齒全四十二香湯浴之重葬焉

三平和尚

三平和尚處之麗水人少出家受具戒持律精猛人天
共仰築精舍於南明山是爲大安嘗乘虎至溪津叱虎
還徒步入城比晚虎出候於溪載還山以爲常

必康

少康籍雲仙都人。母夢至西湖峯。見玉女手持青蓮花。授之曰。此花吉祥。寄汝。已而有娠。迨生。青光滿室。香若芙蓉。七歲。未言。母抱入靈山寺。瞻禮佛像。康忽唱言曰。釋迦佛聞者。異之。十五歲出家。從學諸方。貞元中。至長安。求見留善導和尚真像。像化爲佛身。謂康曰。汝依吾行法。化導衆生。同歸安養。名爲善導。康如所證。南至江陵。果願寺。遇一僧。謂曰。汝化緣在睦州。言訖。不見。康因至睦州。日乞食城中。得錢。誘小兒。誦阿彌陀佛一聲。遺

一錢卽高峯巔建淨土道場集眾齊聲念阿彌陀佛康
獨聲高見佛從口出連誦其出若聯珠坐逝之夕有光
燭烏龍山山變爲白色宋元符二年賜號曰廣道大師
天然

天然不知何許人初習儒學將入長安應舉宿於逆旅
忽夢白光滿室占者以爲解空之祥遂往叅馬祖纔見
以手托幞頭額祖熟視良久曰南嶽石頭汝師也還抵
南嶽仍以前意授之石頭以爲法器親爲薙落又爲說
戒法師乃掩耳而出便往江西再謁馬祖未叅禮便入

僧堂內騎聖僧頭而坐時大衆驚愕遽報馬祖馬躬入
堂視之曰我子天然師卽下地禮拜曰謝師賜法號因
名天然馬祖問從什麼處來師云石頭馬云石頭路滑
還蹉倒汝麼師曰若蹉倒卽不來乃杖錫觀方居天台
華頂峯三年徃徑山禮國一禪師尋至龍門香山與伏
牛爲莫逆交後於慧林寺遇天大寒師取水佛焚之人
或謂之師曰燒取舍利人口木頭何有師曰若爾者何
爲謂我一日徃南陽謁忠國師見便展坐具國師云不
用不用師退步國師云如是如是師却進前國師云不

是不是師達國師一匪便出國師云去聖時遙人多懈怠三十年後覓此漢也還難得師後向南陽丹霞山結茆以居學徒雲集三年間遂構成大院長慶四年六月忽告門人曰備湯沐吾欲行矣乃戴笠策杖授屨垂一足未及地而化壽人十有六勅謚智通禪師

文舉

文舉姓張氏東陽人十九落髮始墮息慈以四分律爲學晝夜翹勤遂登講座大通法華義疏得智者之膏腴舉身量六尺其形如山目不迴視口無戲言四威儀中

無非律範。丹丘二衆仰爲繩準。其奔走聽受者。與佛窟則公禪道並馳而爭先也。尋勅爲國清寺大德。會昌二年五月化去。報齡八十有三。僧臘五十有五。

道遵

道遵字宗達。姓張氏。吳興人。初從天竺威律師受具戒。首宗毘尼傳教。後學天台一心三觀法門。臨壇度人。徒盈石室之籌。天寶中。於靈巖道場行法華三昧。忽覩大明上燭於天。我身正念。儼在光中。異日問荆溪禪師曰。此智慧光明。從心流出也。又於支硎山入法華道場觀。

此身在虛空中坐。先師者知是。落垢之相。無何以無疾。
示滅報齡七十有一。僧夏四十有六。

豐干

豐干不知何許人。居天台山國清寺。剪髮齊眉。布裘擁。
質人問佛理。止答以隨時二字。樂獨春穀役。同城旦應。
赴齋炊。不辨動痒。常誦唱道歌。乘虎直入松門。眾僧驚。
畏。寺厨中有二苦行。曰寒山拾得。終日晤語。聽者不解。
時以風狂目之。獨與豐干相親。一日寒山問古鏡不磨。
時如何。獨照。豐干曰。冰壺無影像。猿猴探水月。曰。此是。

不照燭也。請師更道。豐干曰：「萬德不將來教我道什麼？」寒拾俱禮拜。豐干導入五臺山巡禮。路逢一老翁，問：「莫是文殊否？」曰：「豈可有二文殊？」豐干作禮未起，忽然不見。至五臺經數年後，回天台，山示寂。

寒山子

寒山子，本無氏族，嘗居始豐縣寒岩中，遂名寒山子。容貌枯瘠，布襦零落，以樺皮爲冠，曳大木屐。時來國清寺，就拾得取，泉僧殘食，兼滓食之。或時徐行廊下，或時叫噪望空，慢罵。寺僧以杖逼逐，拊掌大笑而去。一日，豐干

謂之曰汝與我遊五臺卽我同流若不與我去非我同
流曰我不去豐干曰不是我同流寒山因問曰汝去做
甚麼豐干曰我去禮文殊曰汝却不是我同流初間丘
獵出牧丹丘來謁豐干乞示安危之兆豐干曰到任記
謁文殊普賢曰此二菩薩何在豐干曰國清寺執爨者
寒山拾得是也間丘拜辭乃行尋至山寺訪之見二人
圍爐語笑間丘不覺致拜二人連聲咄叱復執間丘手
笑而言曰豐干饒舌彌陀不識禮我何爲遂相携出松
門自是不復入寺間丘又至寒岩禮謁二人高聲喝之

曰賊賊便縮身入岩石縫中唯曰汝諸人各各努力其
石縫忽然而合杳無蹤跡問丘哀慕不已令其徒道起
檢其遺物惟有木葉書詞數十首而已

拾得

拾得不知所自豐干經行聞兒啼聲遂尋之見一子可
數歲携至國清寺付典座僧養之因名拾得稍長令知
食堂香燈忽一日輒登座與佛對盤而食復呼陳慥如
曰小果聲聞倘若無人執筆大笑典座僧忿然罷其堂
任令厨内滌器洗濯纔畢澄濾食滓以筒盛之寒山來

必負之而去。一日掃地寺主問曰：汝名拾得，畢竟姓箇甚麼？住在何處？拾得放下掃帚，叉手而立。寺主因測寒山槌胸云：蒼天蒼天，拾得却問汝作甚麼？曰：豈不見東家。人死西家，助哭二人作舞，大笑而出。每日僧厨下食，爲烏鳥所啄，拾得以杖杖護法。伽藍曰：汝食不能護，安能護伽藍乎？是夕神見夢合寺僧曰：拾得打我，詰旦衆僧說夢符同。一寺駭異，始知非常人也。特牒申州縣郡符下云：賢士隱遁，菩薩應身，宜用旌之號。拾得爲賢士，復竟隱名而逝。

荳祐

靈祐初作沙彌，受具龍興寺。自福唐至國清，求戒時寒山拾得掃松迎迓臨行，寒山送之云：「千山萬水遇潭，卽止遂往泐潭，領旨百丈應司馬頭陀之識，居大湫山，橡果克飢，遂興爲仰一宗。」

道欽

道欽姓朱氏，崑山人。弱冠服膺儒教，玄素禪師一見以爲法寶。欽因求爲弟子，素躬與落髮，因戒之曰：「汝乘流而行，逢徑卽止。」欽遂南行，抵臨安，見東北一山，因訪於

樵子曰此徑山也乃駐錫焉馬祖令門人智藏來問十二時中以何爲境欽曰待汝迴去時有信藏曰如今便迴去欽曰傳語却須問取曹溪大曆三年詔至闕下代宗親加瞻禮一日欽在內庭見帝起立帝曰師何以起欽曰檀越何得向四威儀中見貧道帝悅賜號國一禪師頃之歸山說法而逝世壽七十有九勅謚曰大覺

圓修

圓修富陽人母夢日光人子因而有孕及誕異香滿室遂名香光九歲出家受名圓修二十受戒於荊州果願

寺一日游至孤山永福寺有辟支佛塔時道俗共爲法會師振錫而人有韜光法師問曰此之法會何以作聲師曰無聲誰知是會後見秦望山有高松萬蘿繁密盤屈如蓋遂棲止其上時人稱爲鳥窠禪師元和中白君易出守茲土入山禮謁乃問曰禪師住處甚險師曰太守住處尤險白曰弟子位鎮江山何險之有師曰薪火相煎識性不停得非險乎又問如何是佛法大意師曰諸惡莫作衆善奉行白曰三歲孩子也解甚麼道師曰三歲孩子道得八十老翁行不得白遂作禮長慶四年

忽告衆曰吾今報盡言訖坐亡

如訥

如訥未詳其何許人。目有重瞳。垂手過膝。自翠微得法。乃止於道場山。薙草阜庵。學徒四至。遂成禪苑。廣闡法化。僧問如何是教意。師曰。汝是看僧禮拜。師曰。明月鋪霄漢。山川勢自分。問如何是得聞性不隨緣去。師曰。汝聽看僧禮拜。師曰。聾人也。唱胡笳調好。惡高低。自不聞。僧曰。恁麼卽聞性宛然也。師曰。石從空裡立。火向水中焚。問虛空還有邊際否。師曰。汝也太多知。僧禮拜。師曰。

三尺杖頭挑日月，一塵飛起任遮天。一日上堂說法竟，
谷寧端坐而遠所遺壞衲王事，及開山拄杖，今在影堂
中。

良价

良价會稽人，姓俞氏。從五洩縣禪師剃落，具戒遊方。首
謁南泉，值馬祖講日。修齋次，南泉問衆曰：「明日設馬祖
齋，未審馬祖還來否？」衆皆無對。价出對曰：「待有伴，卽來。」
南泉聞已，讚曰：「此子雖後生，甚堪雕琢。」師曰：「和尚莫壓
良爲賤。」大衆爲山問曰：「頃聞忠國師有無情說法，良价

未究其微。鴻山曰。我這裡也有。只是難得其人。曰。便請
師道。鴻山曰。父母所生口。終不敢道。曰。還有與師同時
慕道者否。鴻山曰。此去石室相連。有雲岩道人。若能撥
草瞻風。必爲予之所重。既到雲岩。同無情說法。什麼人
得聞。雲岩曰。無情說法。無情得聞。你曰。和尚聞否。雲岩
曰。我若聞。汝卽不得聞。吾說法也。曰。若恁麼。卽良价不
聞。和尚說法也。雲岩曰。今我說汝。尚不聞。何況無情說
法也。你乃呈偈云。也太奇也。大奇。無情解說。不思議。若
將耳聽。聲不現。眼處聞。聲方得知。遂辭雲岩。便攜鉢鉢。

後因過水觀影。大悟前旨。遂盛化高安之洞山。因爲雲
岩諱。日營齋。僧問和尚初見南泉發迹。爲什麼與雲岩
設齋。師曰。我不重先師道德。亦不爲佛法。只重不爲我
說破。僧問和尚爲先師設齋。還肯先師也。無。師曰。半肯
半不肯。曰。爲什麼不全肯。師曰。若全肯。卽辜負先師也。
師有時云。體得佛向上事。方有些子語話。分。僧便問如
何是語話。師曰。語話時。闇。黎不聞。曰。和尚還得聞否。師
曰。待我不語話時。卽聞。僧問如何是正問正答。師曰。不
從口裡道。曰。若有人問。師還答否。師曰。也未問。問如何

是從門入者非寶。師曰：便休便休。僧問師：尋常教學人，行鳥道未審如何是鳥道。師曰：不逢一人。曰：如何行。師曰：直湏足下無絲去。曰：只如行鳥道，莫便是本來面目。否。師曰：聞黎因什麼顛倒。曰：什麼處是學人顛倒。師曰：若不顛倒，因什麼認奴作郎。曰：如何是本來面目。師曰：不行鳥道。師將圓寂，謂衆曰：吾有開名在世，誰爲吾除衆皆無對。時沙彌出曰：請和尚法號。師曰：吾名已謝，咸通十年三月，命剃髮披衣，令擊鍾，儼然坐化，勅謚悟本大師。

法明

法明不知何許人落魄嗜酒佯狂不羈終日大醉善唱柳詞人以醉和尚稱之明日我醉且醒君醉奈何混俗和光然實不染一塵也一日居靈隱寺中忽謂衆曰吾當行矣乃書一偈云平生醉裏顛厥醉裏却有分別今朝酒醒歸何處楊柳岸曉風殘月擲筆而逝

湛然

湛然姓戚氏常州人家本儒墨獨有遁俗之思嘗夢被僧衣披二輪游於大河議者以爲當以止觀二法度羣

生於生死淵中也。遂以居士服受左溪朗公天台教誨。天寶初。始解縫掖而登僧籍。久之。朗公捐代。然乃大啓上法。旁羅萬行。盡攝諸相。人於無間。卽文字以達觀導。語。然以還源。乃祖述所傳章句。凡十數萬言。心度諸禪。身不踰矩。三學俱熾。羣疑日潰。求珠問影之類。稍見罔象之功。行止觀之盛。始然之力也。天寶大曆間。詔書連徵。辭疾不就。建中初。示病。佛隴道場說法。隱几泊如。而化。號曰天台教主。建塔附於智大師之原。

船子和尚名德誠初叅澧州藥山弘道儼師儼師曰子
後上無片瓦下無錐地大闡吾宗與道吾雲岩二人爲
道契自離藥山乘小舟往來松江朱涇以綸釣舞棹隨
緣而度號船子和尚夾山善會初叅石樓住京口鶴林
寺道吾過之知其所得尚淺令叅船子會至朱涇見誠
大契宗旨辭行回顧再四誠喚回會立起橈口汝將謂
別有處邪迺覆舟入水而逝

船光

船光蜀人長慶初辭師出遊師囑之曰遇天可前逢巢

則止。後至錢塘遊靈隱山，巢枸塢。時白樂天守郡，悟曰：「此吾師之命我也。」遂結庵以居。樂天聞之，遂與爲友。題其堂曰「法安」。嘗以詩招之入城，韜光不赴。裁詩報之，有「明月難教下碧天之句，真本色住山人」。

會通

會通杭人姓吳氏，初名元卿。德宗朝爲六官使，方春韶，花卉盛發，翫賞移時，因感悟，自是忽忽不樂。帝恠而問其故，以願從釋對，遂放歸。見韜光，光令見鳥窠。鳥窠爲視髮，服勤數年，未蒙印授。一日告辭，鳥窠曰：「汝何往？」曰：

諸方學佛法去。曰。若是佛法。吾此間亦有少許。曰。如何。是佛法。鳥窠於身上拈起布毛吹之。通卽豁悟。不復他行。世號布毛侍者。

景欣

景欣仙遊人。本白雲山受業。得石霜開示而止。丹丘湧泉之蘭若。一日。欣不披袈裟喫飯。有僧問。莫成俗否。欣曰。卽今豈是僧耶。有彊德二禪客。到於路次。見欣騎牛。不識欣。乃曰。蹄角甚分明。爭奈騎者不識。欣驟牛而去。二禪客憩於樹下煎茶。欣還下牛。近前不審。與坐喫茶。

欣問曰二禪客近離什麼處曰離那邊欣曰那邊事作麼生彼提起茶盞欣曰此猶是這邊那邊事作麼生二人無對欣曰莫道騎者不識好後卒於所住

圓澤

圓澤惠林寺僧與居士李源友善相約游蜀中峨眉山源欲自荊州沂峽澤欲取長安斜谷路源不可曰吾已絕世事豈可復道京師哉澤默然久之曰行止固不由人遂自荊州舟次南浦見嬾人錦襦負筥而汲圓澤曰此吾託身之所也源驚問之澤曰嬾人姓王氏吾嘗爲

之子孕三歲矣。吾不來。故不得乳。今既見。無可逃者。公
當以符咒助我速生。三日浴兒時。公臨視我。以笑爲信。
後十三年中秋月夜。當與公相見於杭州天竺寺。源悲
悔。爲具沐浴易服。至暮澤亡。而賴乳三日。往視之。兒見
源。果笑。源遂不果入蜀。反居惠林。後十三年。自洛適杭。
州。赴其約。至則聞葛洪川畔有牧童。菱髻騎牛歌竹枝。
隔水呼源。覩之。乃國澤也。歌曰。三生石上舊精魂。賞月
臨風不要論。慚愧情人遠相訪。此身雖異性常存。源問
澤公健否。答曰。李公真信士。俗緣未盡。慎勿相近。願勤

修之又歌曰身。前身後事。茫茫欲語。因緣恐斷腸。具越山川尋已遍。却回烟棹上瞿塘。遂吹笛入烟霞而去。三生石。今在天竺寺後。

道幽

道幽不知何許人。於洞山得法。止台州幽棲蘭若。四方義學。叩關請決者。常數百人。僧問如何是佛。幽曰。汝不信。是衆生曰。學人大信。幽曰。若作勝解。卽受羣邪。幽將示寂。有僧問曰。和尚百年後。向什麼處去。幽曰。調然調然。言訖坐化。

文邃

文邃福州人。少依大慈寰中禪師受業。時巖頭雪峯在衆。覩師吐論。知是法器。相率遊方。後於洞山言下發解。乃爲洞山之嗣。止於欽山。對大衆前自省過舉。云離師太早。不盡師意。僧問如何。是祖師西來意。邃曰。梁公曲尺。誌公剪刀。僧忝邃豎起拳頭云。若開成掌。卽五指忝差。如今爲拳。必無高下。汝道欽山通商量。不通商量。其僧近前。亦豎一拳。邃曰。便恁麼。只是個無開口漢。僧云。未審和尚如何接人。邃曰。我若接人。共汝一般去也。僧

去特恭於師也。須吐露。遂曰。汝若特來。我須吐露。僧云。便請師乃打之。其僧無語。遂曰。守株待兔。枉用精神。便下座。

惠符

惠符姓戚氏。諸暨人。弱冠。勇氣逼人。角力馳逐。無有及者。忽厭俗。出家於香岩寺。矯迹柔心。淳淑頓變。納法之後。練行孤標。每夜沿山。據草坐安禪。不動。後結茆霍山頂上。研尋經論。忽見巨蛇。張口當前。毒火熾然。符徐語之曰。汝尋宿債。吾可噬也。不然。洗心定意。當來受戒。斯

須臾按蛇蹀而去。果化人形來求出家符。爲之落髮披
衣受訖。禮辭而退。後被告符私度。符具以實對。吏知其
非常而縱之。後符凡見瘡癰膿流蛇皆爲吮之。立瘥。至
開元中無疾而卒。茶毘之日見骨節相連如鈎鎖云。

神暄

神暄姓留氏建州人出家。葵之開元寺誦七佛俱胝神
咒晨昏無間。移住金華山北洞。百家岩石穴中不構庵
室。作露地頭陀。有神人吐紫色雲氣而高覆之。還望亭
亭如華蓋然。其神人時來問道。復導往赤松洞之東峯。

安禪數載。神人一日問曰。師復何須。曰。吾在此山之陰。苦於凜冽。神曰。此小事耳。至夜聞喧闐之聲。明旦一小峯移去。

玄宗

玄宗永嘉人。少出家。志求度脫。詣江陵朗禪師。決了疑貳。還至紫金山。結茆以居。山先多虎。從宗卓錫。哮闐絕跡。一日見一老父。趨前作禮。宗問何人。答云。弟子此山虎神也。自從師化。得脫業軀。已生天道。故來報謝耳。言訖不見。宗以大曆二年坐逝。

元慧

元慧姓陸氏平原內史機之裔孫。髫齡穎悟長而溫潤。畏作枯龜思爲瘦雁遂辭親出家空王寺受具初習毘尼後住嘉禾之建興持三白法諷誦五部曼拏羅咸通中隨送佛中指骨舍利往鳳翔重真寺慧於佛前鍊左拇指以爲供養口誦法華不輟火盡灰飛色無撓沮其指不踰月復生如故說者謂鍊指復生與火中蓮花同種而異態也未幾示寂建塔於與會之間爲三白和尚。

崇惠

崇惠昌化玉山鄉人。童真修行。至徑山禮國一欽禪師。
乞度爲沙彌。云我誦俱胝觀音咒。功力無比。欽爲落髮。
授衣。示名崇惠。俄有神白惠曰。師持佛頂少結莎訶。令
密語不顯。莎訶者成就義也。今京室佛法爲外道凌轢。

危若綴旒。待師解救。惠乃趨程西上。時大曆三年。太清
宮道士史華上奏。請與釋宗當代名流角佛力。直法勝
負。以代宗欽向空門。異道憤其偏重。故有是請。遂於東
明觀置前架刀成梯。史華登蹕如常。磴道時。適在互第
顯望。推排無敢躡者。惠奏請於章信寺庭樹梯。衆集。

月若霜雪然增高百尺惠徒跳登級下層有如坦路復
蹈烈火手探沸油仍餐鐵葉號爲飢飢吏華懼怯慙惶
掩袂而退時衆彈指嗟歎聲若雷響帝遣中官宣慰賜
紫方袍一副號曰護國三藏禪師

允文

允文字執經姓朱氏嘉禾人九歲出家師授維摩法華
二經再稔皆通高達者謂之重理或戲問之曰爾出家
擬營何業率然對曰當陟蓮花臺作師子吼耳十六削
頂接嵩山論壇大德遠和尚獲無邊作法仍就中夏攻

相部律宗并中觀論補衣分衛寒煥四周既叩義方旋
入師室玄樞律範尤見精微後止越之嘉祥寺敷其經
律默約聽徒頗爲嚴毅聞其警策者往往涕泗交橫悛
心率行中和二年示疾化去世壽七十有八

慧聞

慧聞衢州人常勸人以檀波爲第一嘗於龍游嚴江鑄
丈八金身像有清溪夫嬬二人將一大鑑來詣聞爲普
祝之曰此鑑鼓鑄若當佛心前者乃是夫婦發心之至
追厥模顯像果然鑑當佛心又嘗往豫章勸化得黃金

數鎰路遇賊劫聞遂投金水中曰慮損諸君福田請自
撈取賊衆人水求之不得及聞還州金冥然已在其室
時山路虎聞或逢之以杖叩其腦曰汝勿害人吾造功
德何不入緣明日虎斷一野彘投闌前彈耳而去

澄觀

澄觀山陰人住寶林寺將譔華嚴義疏於夢寐之間見
一金人以手抱之咀嚼都盡自喜爲吞納光明徧照之
徵及疏成二十軸堂前池中開合歡蓮花五枝一花皆
有三節後於中條山棲岩寺住寺先有禪客拳眉剪髮

字曰痴人被短褐雜語凡所指斥皆多應驗觀未至之前忽舉衆僧洒掃曰不久菩薩當至德宗嘗召至京師命譯烏茶國所進華嚴經賜號清涼國師

一行

一行鉅鹿人性澁記讀經文不再過初事普寂禪師精大衍數嘗至天台國清寺見門前有流水一行立於門屏間聞院中僧於庭布筭既而謂其徒曰今日當有弟子求吾算法已合到門豈無導達耶卽除一筭又謂曰門前水合却西流弟子當至一行承言而入稽首請法

畫授其術而門水仍復東流自此一行之名震於遐邇
玄宗召對無恒占其災福若指於掌言多裨益邢和璞
嘗謂尹愔曰一行其聖人乎漢洛下閎造大衍曆云後
八百歲當差一日則有聖人定之今年期畢矣而一行
造大衍曆正其差謬則洛下閎之言信矣帝嘗問國祚
幾何有留難否行曰鑒輿有萬里之行社稷終吉帝驚
問其故不答退以小金合進之題曰至萬里卽開帝一
日發合視之蓋當歸少許及祿山亂駕幸成都至萬里
橋忽悟未幾果歸昭宗初封吉王唐至昭宗而亡故云

終吉至開元末減度年四十有五帝哭之甚哀輟朝三日親製文書於石出內庫錢五十萬建塔銅人原謚曰大慧禪師

兩浙名賢外錄卷之四終